

## 北遊詩鈔

### 七言古體

#### 行路難

臺北有道大如天，人流車潮往復旋，煙花京華遊樂地；尋歡眾客好留連。  
放眼城中富麗春，津途猶有顛沛人；家艱足蹇行不得，蝸居坐嘆苦寒身。  
最羨北捷通四方，迅疾不覺路迢長；可憐人意相背遠，盛暑心帶六月霜。  
行路難，行路難；青蓮徒詩蜀道難，寧不知北城道路平且寬，平地能起險波瀾。

#### 中秋夜宴作兼寄不至諸君

秋夕佳人難追陪，惆悵不共菊花杯；衷情欲訴嬋娟語，嬋娟罔聞自徘徊。  
萬里秋訊愁相望，良宵使君安在哉；迢遞關山不可致，情寄明光心尚孩。  
霜露已重月華冷，嘉室綺窗莫惜開；皎皎清輝迎窗入，應是故人送月來。

### 五言古體

#### 飲酒詩

吾愛古飲者，引觴絕俗塵；倜儻傲今世，誰更與之倫。  
第一李太白，飲中謫仙人；邀月對影酌，風流何需親。  
尤憐嵇中散，琴酒陶天真；臨刑東市上，未曾減丰神。  
步兵脫形跡（註），沽醉美婦鄰；酣眠臥其側，疑忌不及身。  
深慕陶彭澤，憂醒不憂貧；逍遙棄冠冕，愛攜鹿酒巾。  
清濁比賢聖，聖賢非陷淪；量淺不善飲，未若莫沾唇。  
悄悄慍酒駕，動多肇禍因；毀人天倫樂，屢聞總悲辛。  
**※即阮籍，曾任步兵校尉，世稱阮步兵。**

### 七言律詩

#### 春遊擎天崗草原

春渡許顏新石橋（註），高岡鮮翠步逍遙；萋萋哀昔王孫別，楚楚喜今行客招。  
芳草錦茵鋪嶺岳，晴原瑤圃接雲霄；何須花海閒妝點，綠滿平川韻益嬌。  
**註：可通擎天崗，1896年由商人許清顏出資興建，後被沖毀，現為重建之新橋。**

#### 登魚路古道

先民襁褓始交通，我輩登臨心未窮；魚路風光天地迴，草山春色古今同。  
石場遺址人煙外，營地敗垣榛莽中（註）；古道流鶯應舊識，年年痴囀喚東風。  
**註：「石場」：打石場，位於魚路古道北路，為從前採集石材之處。**

**「營地」：守礮營地，硫礮為製造火藥原料，清廷以往在此駐兵守衛。**

### 詠陽明山杜鵑

綺麗陽明照眼新，移來蜀魄倍精神；煙霞約許山中客，風月情甘花下臣。  
色抹朝雲姿爛漫，香凝曉露韻輕淳；不隨杜宇啼聲盡，長駐珍叢一片春。

### 訪陽明書屋

山藏祕境覓清幽，更上陽明第一樓，樓閣榮華權貴散，庭園寧謐市人遊。  
緬懷東主音容杳，遠眺北峰林木柔（註1）；唯有哲賢名尚在（註2），德侔河嶽兩風流。

註1：北峰：為陽明書屋對面之七星山。

註2：哲賢：指王陽明。

### 邀友圍棋

對奕閑來樂事清，忘憂十九道縱橫；手談誰可言心迹，坐隱自能怡性情。  
世局難同分黑白，秤盤易與斷輸贏；邀君聊此消長日，不作紅塵榮辱爭。

註：「手談」、「坐隱」皆為圍棋別稱。

### 秋訪西門紅樓

情絲一縷繫紅樓，弔古衷腸幾度遊；八角廳堂迎蠟屐，百年丰采豁吟眸。  
劇場粉墨娛賓賞，市集琳瑯喜客留（註）；雅座閑觀來往眾，一杯清茗詠涼秋。

註：西門紅樓二樓為劇場，北廣場則是創意市集場地。

### 淡水紅毛城

昔時堡壘固邊防，三百年間夢一場；事歷六朝遺跡久（註），城臨千里淡江長。  
威餘古炮望青嶺，韻蕩迴廊撫赤牆；日暮憑欄無限意，可憐神采弔斜陽。

註：六朝：紅毛城歷經西班牙、荷蘭、明鄭、清、日治至今共六個朝代。

### 板橋林家花園

閒情促我叩朱門，欲向蓬萊訪綺園；不見主人春寂寞，猶來賓客景妍暄。  
樓臺富貴憐猶在，人物風流惜未存；方鑑齋中歌詠處（註），今唯默默倍銷魂。

註：「方鑑齋」為林家花園庭院之一，為昔日主人宴請賓客吟詩歌詠之處。

### 夕臨淡水

長閑何事可消磨，每愛忘形淡水河；潮送光陰天際逝，聲喧街肆耳邊過。  
無語彩雲依黛嶺，含情紅日泛金波；斜陽雖好朝朝異，須珍佳夕莫蹉跎。

### 故宮秋行

癖好瑰奇何處求，雅懷近訪故宮秋；凜觀彝鼎神無滅，怡賞玉金光欲浮。  
史載漢唐開氣象，書臨晉宋寫風流；幾多紫禁城中物，留予人間供一遊。

### 於莽葛拾遺讀萬華史籍有懷（註）

莽葛拾遺誰賞音，長憐舊籍自關心；遺珠難覓因緣淺，古物珍藏意義深。  
歲月臨門人往返，榮光載冊勢浮沉；遍觀文史知多少，艸屺風流話到今。

註：「莽葛」為艸屺舊稱，「莽葛拾遺」是位於龍山寺對面的由舊民宅改造的二手書店，店中除出售二手書籍外更收藏許多有關萬華歷史的舊文物與史料。

### 翠玉白菜

琢磨翠玉玉玲瓏，讚嘆匠師神鬼工；數瓣深青雕菜葉，一絲淺碧刻螽蟊。  
流離烽火源中國，璀璨風華藏故宮；錦帕無需勤拂拭，分明流轉寶光中。

### 清水巖祖師廟

古蹟萬華名素聞，祖師廟下往紛紛；迄今靈感迎香客，憶昔神威退法軍。  
燭映高壇春更在，跡遺後殿火曾焚；當年頂下干戈事（註），回首相看過眼雲。

註：西元一八五三年，艸屺商業正興，卻發生頂郊與下郊人因碼頭力仗口角及商業利益大械鬥，俗稱「頂下郊拼」，清水祖師廟後殿也因此焚毀。

### 士林官邸賞菊

西風欲慰我相思，吹綻霜栽千萬枝；一夕士林秋勝處，數朝官邸客來時。  
開花眾愛榮華貌，傲世誰憐隱逸姿；艷質徒教天下重，素心濁俗不相宜。

### 臺北燈會

月似銀盤燈似林，爭輝燈月韻沉沉；綵燈鬧市迎千戶，火樹燎空綻萬尋。  
衣錦伶優揚鳳舞，繞樑絲竹動龍吟；良辰玉漏催休急，惜取行春此夜心。

### 重訪九份

老街再訪是基山（註），丰韻猶存岑郭間；樓曳紅燈添古色，歲凋金粉換新顏。  
蕭疏一度雲流去，繁盛此番風逐還；翠嶺滄波依舊在，興衰不管自悠閒。

註：即「基山街」。

### 陽明山小隱潭看殘梅有懷

獨秀乾坤第一枝，羞和桃李綻同時；潭邊疏影清尤艷，物外幽香冷愈奇。  
淑氣消融千樹雪，芳魂勸慰數行詩；悵然玉骨唯枝葉，嗟嘆尋春已較遲。

### 北投溫泉

東風拂水北投春，地是桃源過往頻；淵出藍田泉瀉玉，氣蒸碧樹霧浮銀。  
溫消心緒千般慮，滑濯肌顏萬里塵；莫惱秋霜生鬢髮，浴來能變少年人。

### 逢雨

溽暑煙銷塵俱微，南風臨夜雨霏霏；玉盤沉霧晴難在，客地無親心晚歸。  
快意人生須一笑；深情歲月莫單飛；推窗莫道霖淋苦，更有清吟助月輝。

## 七言絕句

### 打字

打字漸成平日事，揮毫已是舊衷腸；非因筆墨難爲用，恐寫惡詩汗紙張。

### 天元宮賞櫻

朵朵懸枝滿赤霞，妙將雲彩剪飛花；天元宮外韶華景，引逗城中幾萬家。

### 夜觀關渡橋

關渡大橋佳似虹，夜觀更與鵲橋同；霓燈燦爛星河影，天上人間情感通。

### 賞楓

萬木千山盡露霜，斑斕葉葉艷春光；多情幽徑凝眸處，一片深紅出淺黃。

### 過林語堂故居（註）

先生故宅草山隈，樓併中西見卓才；雅院清風誰更伴，暗香牆角一枝梅。

**註：位於陽明山，由林語堂先生親自設計。建築是以中國四合院佈局、西班牙式白牆及螺旋柱。**

### 傅鐘

學者精神傳是日，文人風骨憶斯年；傅鐘廿一猶聲響（註），若個沉思到此前。

**註：傅鐘廿一響，位於臺大校園，爲紀念傅斯年校長的名言：「一天只有 21 小時，其餘 3 小時是用來沉思的。」**

### 臺大戲劇系館前白流蘇

和煙堆雪弱難扶，誰把霜魂栽二株；謝女當年如識面，應將詠絮改流蘇。

### 雜感

簷角蜘蛛久作鄰，結絲千縷是何因；東風欲挽留難住，網得飛花誤認春。